



partii naleraq

2. okt 2019

UKA2019/146

Utoqqaat illersuisuat pillugu Inatsisartut inatsisaat nr. xx, xx. xxx 2019-imeersoq
(Peqqissutsimut, Isumaginninnermut Inatsisinillu Atuutsitsinermut Naalakkersuisoq)

Utoqqaat illersuisussaannik pilersitsiniarnermi inatsisissatut siunnersuut saqqummiunneqartoq pillugu Partii Naleqqamiit oqaaseqarfigissavarput.

Nunatsinni utoqqaat illersuisoqalernissaannik saqqummiussaqaarneq nuannaarutigalugu tamakkiisumik tapersorsoripput oqaatigissavarput, isumaqarpugullu utoqqarnut illersuisoqarnikkut pissutsit pitsaanerulissappata aamma illersuisunngortussap sulinermi atugarissassai ilanngullugit pitsaasumik aqqinniartariaqartut minnerunngitsumillu aamma atorfilittaqaarnikkut allaffissornikkullu isumannaatsumik atugassaqaartinneqartariaqartut.

Nunatsinni utoqqaat atugaat ataatsimut qiviassagaanni ajoraluartumik assigiinngitsorujussuupput ilaatigut aamma malunnartarluni kommuni najugaqarfigisaq qanoq aningaasaqaarnikkut inissisimanersoq apeqqaataalluni atukkat ilaatigut pitsaanerullutillu pitsaannginnerusartut.

Ukiuni makkunani utoqqaat peqqissut amerliartuinnarput tamannalu tulluusimaarnaqaaq taamaattumik siunissami utoqqartatta atugaat isumannaannerusunngorlugit aqqissuunneqartariaqarput ulluinnarnilu atugaannut naapertuuttumik atugaqartinnissaat qulakkeerniartariaqarparput.

Utoqqat aamma amerlasuut sulisinnaanermikkut killeqalersimasut takusinnaavagut taakkulu isumannaannerusumik atugaqassappata ulluinnarni inuuniarneranni illersorneqarsinnaasumik aqqissuussiffigisariaqarpagut.

Utoqqaat illersuisussaata ulluinnarni sulinermi naqisimaneqaanngitsumik sullissinissaa pingaaruteqarluinnartoq oqaatigissavarput. Aammalu isumaqarpugut sumulluunniit attuumassuteqaanngitsumik utoqqaat illersuisuata sulisinnaanissaa utoqqarnut illersuisuunermini pingaaruteqartorujussuaq, tassanilu ersarissumik oqaatigissavarput uagut isumaqatiginngilarput isumaginninnermi pisortaqaarfiup iluani sullinneqassasoq kiffartuunneqarlunilu.

Tassami uani aamma isiginiagassat ilagaat utoqqarnut tunngasut suliassat amerlanerpaat isumaginnittoqarfiup iluani suliarineqartarput taamaattumik pissusissamisoorutut uagut isiginngilarput Naalakkersuisut siunnersuutaat malissallugu tassami naqisimaneqaanngitsumik suliassat ingerlassappata isumaginnittoqarfiup ataanut inissittariaqaanngilaq.

Aammalu sulineq ingerlalluassappat taava aamma aningaasalersuinikkut periarfissat killeqarpallaartut nalilerpagut aningaasat atugassiissutigineqartussat ikippallaartut nalilerpagut.

Tassami sinerissami utoqqarpassuit orninneqartarnissaat pinngitsoorani pisartussaavoq, tassami utoqqaat peqatigiiffii amerliartuinnarput orninneqartarnissaallu pinngitsoorneqarsinnaanngillat utoqqaat illersuisuat tamakkiisumik sulissapat.

Utoqqarnut atugassarititaasut assigiingeqaat sinerissami najugallit eqqarsaatigalugit. Utoqqaat soorlu aapparminnik napparsimasoorut DK-mut ornigunniarlutik tusartarpagut oqarfigineqartarsimasut utoqqalinersiuteqarputit utoqqalinersiuteqaravit ikiorneqarsinnaanngilatit. Taavalu kommunimi allami periarfissat pitsaanerujussuullutik. Tamakkua assigiinngitsunik kiffartuussinerit tassa assigissarneqartariaqarput utoqqaat erloqisillugit anersaakkut tarnikkullu sullinneqarsinnaanngimmata.

Assersuutigalugu aamma ukiuni makkunani utoqqaat illuinut nuunniartut piffissami sivisuumi utaqqisinneqartarput. Utoqqaat amerliartorput taamaattumik isumaginninnikkut sullinneqarnerat aammalu utoqqaat illui ilanngullugit pitsanngorsartariaqarput.

Utoqqaat illui amerlanerusut siunissami qularnanngivippoq pisariaqartilissagigut massakkummi utaqqisut ilaatigut sivisuumik utaqqisareerput taamaattumik siusissumik utoqqaat illuinut pilersarusiornissat ilanngullugit aallartitariaqalerput.

Aammalu utoqqaat pisinnaasut illui ilanngullugit pilersarusiorneqartariaqarput, utoqqaammi peqqissut kissaatiguannarpaat namminneq pisinnaatillutik imminnut sullinissartik tamaattumik aamma utoqqaarnut pisinnaasunut illunik sanaartornissat ilanngullugit pilersarusiorniarlik.

Sisimiut kommuniata tamaanikkut ingerlagallaramik ajunngilluinnartumik aaqqissuussinikuupput utoqqarnut pisinnaasunut tamannalu assut utoqqarnik iluarisimaarneqartorujussuaq oqaatigissavarput.

Kiisalu utoqqaat napparsimalersimasut peqqinnissaqarfimmi nakkutigineqartussaagaluartut amerlasuut utoqqaat illuinut nuuginarneqartarput, pissutsit taamaannerat aamma ilanngullugu eqqarsaatigisassaavoq, utoqqaat sullinneqarnerat isumannaanerussapat napparsimalersimasut peqqinnissaqarfiup sullippagit utoqqarnut pineqartunut pitsaanerpaajussammat.

Angerlarsimaffinni utoqqaat kisimiittut ikiorneqartarnerat aamma sulisussaqaarniarnikkut pitsaanerusunngortitariaqarpoq. Ajoraluartumik angerlarsimaffinni ikiortit pissarsiariniartarnerit assut ilaatigut ilungersunarsinnaasartoq nakkutiginnittut oqaatigisarpaat. Tassalu ulluinnarni sulinermi aamma tugassarititaasut eqqarsaatigalugit pitsaanerusariaqartutut uagut isumaqarfigaagut.

Aammalu utoqqaat illuini sulisartut akissarsiat tungaasigut pitsaanerusumik atugassaqaarnissaat qulakkeerniartariaqarparput akissarsiat appasippallaarnerat pissutaasarmar sulisussaqaarnikkut ajornartorsiortarnermut annertuumik. Partii Naleqqamiit isumaqarepugut utoqqaat illuini aammalu angerlarsimaffinni ikiortaasartut akissarsiamikkut pitsaanersumik atugassaqaartinneqartariaqartut sulisut amerlanerusut ataavarnerusullu pissarsiarineqassapata.

Utoqqaat illersuisussaasut suliasarpassuarnik peqarpoq siunissami utoqqaat sullinneqarnermikkut isumannaannerusumik illersorneqarlutik ingerlalnissaat qilanaaralugu isumalluarfigaarput.

Taamatut oqaaseqarluta utoqqaat illersuisoqalernissaat tamakkiisumik tapersorsorparput ataatsimiititaliamilu suliarineqarnissaa innersuussutigalugu.

Hans Enoksen